



ГАЗЕТА 1931 ПО' АПРЕЛЬ ИРЫҔ ЮКАД ВАТА ХАСАВАЮДИМДЕЙ ЯЛЯХАД ҢАДИБЕРҢА

СИ" ИВ ЯЛЯХАНА ҢОПОЙ" СЕРТАБИВА"

Мэбета вадава" ила' панан' естри' мэква"! НЯРЪЯНА НЭРМ



№ 32 (5306)
 2026 по'
 август ирыҔ
 8 яля
 СУББОТА

Российская Федерация Ямало-Ненецкий автономный округ



Сидяңг: Андрей Пономарев' тадтавы

Ту сяндада
 яңгу

3 >

Та' ер' яляхана мядо"мы"



Сидяңг: Марина Яр' тадтавы

Хусувэй по' пилу" иры' нерденахана яна" тер" җоб" җарка хэбидя ялямдо' ядабтамбасеты". Тикы Та' ер' яля. Ханяңы" яха"на җули" ненадо. Неноховавна пудана" по" ямбан' Пэ" хоё" нямна мюсерта" вы' тер" җобт' тэвсетыд". Нянандо' тасалкованзъ хардахад ерв" турцеты".

Тюку по' җани' тарця җэвы. Пэ" тер" «Хада' пэ»' ядхана ма"лэвыць. Хэбидя ялямдо' Василий Лаптандер' җэсыхына мэмэдонзъ. Самляңг җарка мяканандо' мядомы". Ңока ню' небя Антонина Тайбери яля' ямбан' мякананда ненэцие ядембада

сыйхана, җавыдота" җавраха"на җавламбавы. Тикыта помна тамна харта пирдырмаха"на таравы.

Приуральской районхана ненэця" хэбидя яляханандо' 2012 поход җобт' тэворҗа". Тикы' нерцюна Та' ерм' харто' мято' тер няць мэмэдо'. Тедахав' юкад вата самляңг по' ямбан' пилу" ирыхына җани" җэсы" тер нидо' манэць хамеку". Пэ" хоё" нямна мюсерта" няханато' сянакурҗа". Мякнато' малкодари́до' хаюрҗа".

Тодо" җэсыхыт товы" ты пэ́ртя" ненадо яляхандо' җахакуд хамековы". Сямянхат илека серто' – тэхэ"на нертеңгось җэдалёрмадо'.

Ныхыдо' хорпа җани' хуркари" пирдырми сертабавы". Ярколавахана, санар"махана, ныхыдыр"махана мэбетидо' таниявы". Нюдя җацекэхэрт" сянакурмы".

Тюку по' Пэ" тэлхат сидя юд' мян' җэдалёда" товыць. Хасава" сид'лад"мана җэдалёрмыць. Нидо' сахамламбада япти" тёрдо' хоё' лядпавы" Ет' хуркаридо' таниявы": сюрхалаңгавы", ханодо' җэдара́мбавы", тарем' җод" нерняри' тыдо' харебавы".

(Пелямда 2 стр. толаира")

Галина Око́тэтто' падвы

Вэсакоми җарцие"җадм'

Вонгуев' пухуцяха', вэсакохо' мат" ю" по" җобкана илеҗаха'. Ңопой мядм' мэць нянанди' җарка ябдава' сер".



Сидяңг: Юлия Талеева' тадтавы

Неша" шана'ко мянады"



Ңэдм' чел" нешади" ныптакомаң, поңкнатуң шана'комаң мэт Талдкахана мянадыма дядям мэ'җаш". Чуки «Год здоровья» нимит'а похона җука неша" мянадымантуң мэты җома".



Таттама: Лариса Айваседо тадтамы

Паңгхатато' перена" ненэця"

Пилё' ирыҔ хасаваюдимдей' яляхана я' сяр' ниня җоб" җарка ялям' ядабтамби". Невхы", харто' соя"ма яханато' паңгм' мэта" ненэцие" ед' таславы.



Сидяңг: Марина Яр' тадтавы

4 стр. җа

6 стр. җа

8 стр. җа

Та' ер' яляхана мядо"мы"

(Нердена пеляда 1 стр. џа)

Окотэтто Константин харта џэсыда Пэ хада' няд сидя џэдалава' пиркана џа. Та' ер' ялян' мяд' терсавэй" товы. Нямбо Лаптандер сыра' Ты пэрти" ялян' тось я"амсетыда. Мята саць хубтана џа. Теда' џэсыда пирдырць яхаданда хубтарка џэбта џод", мята терсавэй" пирдырманзь товы". Пыда' тыда ёльце мере"мы". Пухуцяда џани' нида нертевы. Ёуданда терџэ посабтамбада џаном', тамна бензогенераторм' ня"амвы.

«Ямал-ню"на" я!» Ассоциация џэвахана мэна Эдуард Яунгад марцьхыда няць џэрм' тер" няхата сава џуда' тердамдо' тэвравы. Тикыдо' нерня' ха"амвы" нито' помна тярмыдо'. Иландо' саирм' тяхасовна теневанахат мале сян ненэцям' ненадумдавы". Ньюбедо' ти" – Окотэтто Константин, Нямбо Лаптандер, Антонина Тайбери. Аксаркахад товы нядо' Гавриил Лаптандер юнета"



Салыңгардахад џэдабтавы «Няръяна Їэрм»хад пудана юндамдо' толавы"



Їока џэсы' терха"на ненэйвана ты" џэхэ"на няваталаңгурма сава џэвысь



Сидяңг: Алексей Салиндер џэдабтавы"

Ты пэрти сававна манзаравандо' е"эмня ненадумдавыдо'

сёбар" сидяңг ма"лавы, таняна манэ"лабтамбавыда. Тovy" ерводо' мюсерта ненэцье" ед' џадимдембада няд"ми" нямна лаханавы".

Ти, тарем' Пэ" тэлхана илена" Та' ер" яляханандо' џобт' тэвормы". Тикэндо' пуд янамбовна сырэй' мэлва" ёто' няю' ямданаңгу". Пилю" иры' нябимдей яляхад нумда сельбя' няю' сюрхалты". Яда янамбовна тасехэйџэ ханда.

Хэбидя яляхана џарка нина" невхы илаңгад теневана" табекудо' тензетесеты": «Яля' ер' пуд пова" џэрёйнда няю' пяңгуда. Ёадьбята яля' еркана тольм' џабта тара. Нядэна" ненэця" тандая' ватавы халям' хыраңгу". Ёодяңдо' таняб" – хуркари" тэнз' џэңгу". Ты пэртия" ты' џаябадм' сертаңгу". Сава џаврадо' мал' толь' ни' мэңгудо'. Ёамза' евэй, пиревы џамза, халя' евэй, тиребя", мыд", пиревы", талтавы" халя", ябцвы" леска", нянь" џэдакы", хардахад тэмдавы" џамнялада" џавар". Тикаха"на хэхэдо' џавлаңгу". Нум' иридо'

иландо' таслаңгу. Маңгбавамдо', сававна илевамдо' харта манэтада».

Тикы' хавна џани џопой вададо' тарця џэсеты: «Ненэй манзаи хэбидя яляхана сертаба ни тара". Не ни сэдораңгу", хасава ни" сябарт", ябтаравы тынзянда хоба таняб", нида маторпаңгу", џарка манзаямда хуняңы ёльцянд' хаеңгуда, яёл' серода пяңгу».

Я' мал' няна илена" ты пэртия" тарця ялям' сабе ехэрадо'. Пэдары" някуна иленахав" невхы" похот мэ"џадо'. Ихинато' хаця таңгворџа". Ёылекарха" неняңгадо' суса". Епдя" паџо ланоме. Ёэрм' няд товы мерця ныхыдамдо' тэврана' то"олха. Паранана ям' хабтабададарев' сарё нумџэ хая. Тю"уд сидна" нум' ирива" ненэсянда мание-нараха. Тарем' џод" пилю" иры-хына џобтики таңгм' ни" хонгу". Ёопой талм' нумгана пэдёдамдо' нэкалпаңгу".



Леонид Ильич Лаптандер Пэ" тер" поңгана юнета ты пэртия"

Тид" манзара

Пилю" ирыхына Ямална" џэвахы ерв Дмитрий Артюхов џарка" хардана" нямна џэдалёрцеты. Тюку по' џани' тарем' ненэцяңг" тэворта. Яна" тер" мале џатена". Хонравандадо' џока.

Хусувэй нултаңгавахананда ненэцье" табековна ханяри' ядэрта. Небой похона ваде"мыто' нямна хонрамбаңгуда. Нянандо' тасалкурта: џамгэдо' по' тяха' яңгамы, ханзер" яханато' ерводо' нядаңгурмы". Едэйвана лехэбтавы" сехэрыто', мивы" хардато' хурка џэвам' намдаңгу. Ёани тоенана серото' џадимб", ханяңыдо' минханда таслаңгуда, џанидо' – марцьхыда няць яля' ня' тидхалембаңгуда, ненэцье" илам' савумдамба по' ямбан' серта табедаңгуда.

Яңга манэ"мандида: џацеки", илебей" ненэцье" тохолкось' я", нюдя" џацеки" сянакулва", лекар" мяд". Ненадовна СВО' няна сайнормы" ненэцье лахана нята.

Ямална" нермбэртя џэдалёромита нямна едэй мутры мэць лаханаңгу. Теда' мале хусувэй ненэць' хонаркован' харвабата, харта вадида нянда пада пиръяда.

Мюсерта" няд"ми тэвравы"

Выџгана, пэдары" нямна мюсерта", нядэна" Ёэрм' тер" хусувэй по' няд"маңэ округхад тарана џаворидамдо' ня"амсеты". Парасин", ной", мяд' лата", џу", хор" џэдакы". Неноховавна илебей мяд' тер" е"эмня таславы" ея мяд' тер" џэсеты".

Тюку си"ив яляхана Ямалской районан' џарка ту џано тэв-выць. Мюнянда џэда" џамгэри" мюсерта" ненэця" илаңгана ёльце тарана". Тикы" – «кожа-юфть», «сыромять». Вы' тер" џахат тыто' подерт тикахат сертабасеты". Тэри лапкаха"на тарця" џамгэри" яңгосеты". Тамна џанохона нись тоса џэдалё мэ"манда" лад' паны тэвравы".

Хусувэй ненэць' тэнзувананда џэрм' тер' џэбта тарця няд"мадамда ня"амванда е"эмня нерде харвабцонда нямна падарм' падбата тара. Мюсерць, нядэ янда хэвхана џэда хардахана Ёэрм' тер" серо ня"амбада управлениехана сидта падропа пада нядаңгу".

Ня"амвы" џамгэридо' мале сян пон' таславы".

Галина Окотэтто' падвы"

Ту сяндада янгу

Тюку по' неняңг" иры' еркад епдя" паңо ёльце я"авлы. Нумда тамбирувна ядемби, я' ний һарханда сэлуйңэ хая. Выңгана, пэдара' помна ядаб", һэт ңылы етри' маркадарта. Ядембада ялэ" хавна тамна хэ" сарё" танияць. Ханяңы" районха"на хэ" ту" янхад ява" парана пэяць. Тикы' хавна һокамбой пеляда я', пэдара' паранава ненэцяңгат миңа.



Сидяңг: Андрей Пономарев: гадгавы

Ямална" тиңгэвна ханярид вэва юн намдорһава". Я' сяр' нийм' лэтрамбада" неняңг" иры' нердена" ялэ" пиркана округханана" сидя юкад вата паранана ям' ваде"һаць. Красноселькупской, Надымской, Приуральской, Пуровской район" няна самляңг юркад вата ненэцяңдо' манзараць. Няд"маңэ сидя һарка тиртя һаном' мэ"һаць.

Теда' пудана" вадидо' тарця":

– Пилу" иры' самляңзимдей яля' һокханда яна" һардавна 195 паранана ям' лэтамбива". Тей яляхад мат" яхана тум' таблаваць. Нядаңгодадана" 821 ненэця" тара". Тет Ми-8 тиртя һано" яха", то" икад идм' тэваби". Пи', ялэ" ямбан' лэтрыва". Ту' варм' етри' маниева". Сата мерцяхад, сэлуй яхад тосава". Ханяңы" яха"на сарёкоця таниясь. Тарем' һод" саць һарка таром' ни тэвра". Я' ний минханда тыраңга.

Яна" һэвахы ерв' вадавна, тум' хабтабада" серодо' тид' минревандо' няю' хусувэй һамгэдо' тания. Тикы' хавна харад' тер", паранана я' хэвхана мюсерта" һэрм' яна" тер" сидто' нядаби". Харто' ямдо' лэтрамба таңгм' ни" хомбю". Тарем' неняңг" иры' еркана Нядаңгарад' няна Наре' хэвхана пэдара табцавыць. Ненэця" һодинда" һэдаравы туңэ ваде"һадо'. Паранана ям' манэ"мы" ты пэртя" минхандо' Нарендо' һэвахана мэна ервхандо' юнм' һэдабтавы". Тикыд тамна' тяха' вадам' мэ"мы". Нядаңгардахана манзарана" ерв" няд"мадамдо' пюрць һани' тую"у' лаханавы". Пон' мэнахандо' я"авлада ту Нюдя Яруде' няд Һарка Яруден' тэвавы". Яха' варувна хадэсавэй"

пя" серамбядрев' тэри лэёмбавы". Хэвы тум' пэдара' поңгана һударихина нир таб"лаңгу". Тарем' һод" ненэця" ныхыто' пирувна писавэй" яля' ямдо' лэтрамбидонзь. Нарехэд няхар" ю" самляңг харад' тер" нядаңгованзь һэдалёрһаць. Сававна сиддо' һарка тиртя һано" нядавыць. Лэёмбада пэдарама' тую"уд икана хабтабавэдонзь.

Яна" һардавна ненэцие табедамби":

– пэдарахана мэбта", тум' нёра" сянакус",

– хасуй я' еркана сяхаңгарт' тум' нёда" пятабю",

– ма"лавы" таборо, хасуй һуво һобтики харта инда сер' ханярина нёйда" парадамбю", тикы' е"эмня таславы" я' тания,

– пэдарахана, выңгана хабтабавэй" сярамбида", серамбида" тэри ян' нёйда" моёшю".

Һарка" нина" манзеты": «Ту ненэй ненэцяңгана хэбидя һамгэ. Сянако ни һа". Ненэця" явоңэ тара. Хибяри выңгы мякнанда тусипой нида пирас". Тухуна пыхыдамда ядемдаңгу. Һаврадамда пиреңгу. Няби' сер' ту ненэцяңд', я', нув' сармик" ед' һарка маям' тэвра пирһа. Харад", пэдара' паранава' ёльцяңгана хибяри" һока һамгэдо' ёцеты". Ту" сяндада янгу».

Та' я паранавахад ёльце лэтрыда". Пихина тум' пятабта", етри' маниера". Сяхари' парана ям' манэпата", ям' лэтрамбадаха" 112 номерт' лаханада".

Галина Окоэтто' падвы

Пэндъи" тэво"ла"

Һэрм' яханана" таңы һэвахананда яна" тиңгывна һэда" хардаха" Саля' яв' мюмня пэдъи минрена" ту һано" ядэрць пэрһа". Ненэцие" илаңгана хуркари" тарана" һаво тэво"ла".

Тованда' ямб сырава" хэнёвна мадавана" е"эмня һахакуд та' хусувэй һамгэвна хамекосетыва". Яв' салаба хэхэва таслама' сер' һаха"на һэда" хардаха" пэндъи һэдарамба пясеты". Һавар", пардон", ту' пия", уголь, харад сулорпа мэта няд"ма", тамна һани" тарана" һамгэ".

Неноховавна һэрм' няңы" хардаха" тэво"ланидо': бензин", солярка", керосин". Тикы һамгэ" тарабодо' саць һарка. Ханяңы" хардаха"на котельнойха"на мядо' тодабтамба, лампа ту"ма' е"эмня мэтидо'. Керосин вертолёт' һамдолаваха"на саць тарана. Бензин ненэцие" мэта"

машинаха"на, буранаха"на, һано' моторка"на, тамна һани" хуркари" серка"на сава.

Пэндъи тэвабада" теда' саць тэтна". «Ямалгосснаб»' һэвахана мэна Владимир Жадовский' вадавна, теда' пэдъито' пел мале тэвавыдо'. Неноховавна һэрм' няюна, һахакуна һэда" Паюте"э, Һэдя' Сё яха хардаха" ту' һано һэдарамаби". Хахаяда Шурышкарской, Приуральской район' ханяңы" хардаха" сыра' котельнойха"на мэ"манда соляркадамдо' тэвравы". Сюнай-Сале' терха"на тундо' пия", Овгорт' хардахана угольто' наңэдя пон' мась һэңгу.

Тикы' хавна вымна мюсерта" ненэцие" ед' Сёяха' хардан' пи" тэвравы".

Пэдъи" минрена" вэба' иры' пудана" ялэ" һэсонд' манзараңгу". Еси ханима" тальцюна хусувэй хардан' ненэцие" илаңгана тарана" һаво тэвраңгу".

Пэдари" илени нядаби"

Пэ' тер" няңы пэдаравна ханелава' ё лэтамбада" ядэрмы". Таниянандо' пэдарахана илени" сармик" хадылаваха" на самнелавы" сэро" ютеро хаевы".

Ненэця" я' ханярина пэдарахана илена" сармик, нув' сармик лэтрамбидо'. Тарця манзаям' ханелава' ё лэтамбада" минредо'. Манзарана" ненэця" хуркари" по' ёльцяңгана пэдари" илени" илм' манэсарць пэрһа". Сыра' няна, тецьда" нуво мадабабнандо' ханяңы" сармик" ныхысылворһа". Ёря сыра' ңылад һаврадамдо' тэва сабе ни" пирас". Нара', пэдара' илени" ханито' һадиворп", нянандо' һани' мэйрама тара. Та' ядембадахат, неняңгахат, пилухот, ниберёхот тасехалпато' сармикэця" һани' ныхысылворһа". Тиканда я' илени лэтрамбава яхана самнелавы" сэро" ютеро хаеба пэрһа". Тарця"

ютерка"на сармикаха"на ханзота" хуркари" һавар' нядма" тания". Тикан' яңэ няелкая лы, һуво, комбикорм пэрһа".

Пэ' няңы я' пэдаравна манзаято' сер' ядэрмы" нина" неноховна хабарти" сарпи" мин' сер' һэда" явна хан"мы". Тикы' яха"на һаволаваңэ таславы" һэсяңо сулормыдо', ханеңэхэ"на һани' несэй" мимбвы". Самнелавы" сэро" ютеро тикахана хаевы". Тарця" һаволаваха" һани" хуркари" тэваси", тёня", таряха", нохо" хадырць турһа". Тикан' турта" сармикэця" нись тоса хадырмандо' е"эмня һаволавадандо' мэта һэсяңодо' сававна тидхалея мимбидо'. Тарця" хадырць мэта" һаво еси" хэвхана сертабидо'. Тиканда пэдара' илени" хадыромахадандо' ид' няку' идарманзь ханта".

Тарем' хадылава" яхана хаевы" самнелавы" сэр" пэдари" илени" няю' һарка няд"маңэ тара".

Алла Вануйто' падвы

Вэсакоми ңарцие"ңадм'

Ким Андреевич, Людмила Алексеевна Вонгуевха' мат" ю" по" ңобкана илеҥаха'. Таҥок по" ямбан' ңопой мядм' мәць – ңарка ябада сер". Иланди' хуркарьсь. Ханяна маймбавахэ', сава сер" таниявакы", етри' ңобкана мәсетыхы'.



Сидяңг: Юлия Талеева' тадтавы

Людмила Алексеевна, Ким Андреевич мале ңарка хибярихи'. Тарем' ңод" хасенавам' ехэраҥаха'

ИЛАМДИ' ТЕНЗЕБТЕМБИХИ'

Людмила Алексеевна тарця" вади хэтась:

– Мань вэсакоми сава хибяри. Хусувэй серкана нядаҥгосеты, мята тер мәнейда, сахарамбида. Хуркари" ңамгэ" илаҥганани' таниясеты", тарця" ңавэ нямд нядабахая таҥга ядабтамба тара". Нини' нядаба, мэнехая таҥок по" нерня' миҗани', сяхаринда ңобкана мәсетыни'.

Ким Людмиланда ня' ниди' Ленинград маркана Герцен' нювм' нюбета институтхана тоходанаванди' мальҥгана торомдэйдinз. Людмила Якутияхад товысь, я"авлада

хасавако Ненэцие" округхана, Хоседа Хард' ңэсыхына илевысь.

1966 похона саво" ирий нюртей яляхана тюнди' ваеравыць. По' хэ"мяхад Ким Андреевич институтм' ёльце"махаданда Хорей Веран' тэвыць. Людмила тамна по' тоходанась, Ленинградхана хаись. Ңамгэ' пиркана вэсаконда хэван' тэвыць.

Тикы похот пыди' ңопой ңэсыхына ңока по" ямбан' ненэцяҥгати' таром' ха"аврамбихинзь. Ңобкана манзаян' тэворцетыхы', ныланаванзь ңэдалёрцетыхы', ңацекиди' сахарамбась вадабихинзь. Пыди' школахана завучҥэ, директорҥэ тараҥаханзь. Хорей Верхана

ңацеки тохоламбадаҥэ пенсиян' тарпванди' ңэсонд' манзараҥаханзь. Ңока хибям' тохоламбвэхэ', иланди' табедамбавэхэ'.

Тамна Ким Андреевичю" няхар" по" ямбан' тикы харданда нерм' пэртяҥэ таравысь. Ңэсы' тер" хибярихи"на тарана" серо тасламбись. Янда тер нядабасеты, нита вади тэри мунзипой" нида хаесету". Хусувэй серт' ивьер' сырта ненэць. Вэсакода пухуцямда' етри' нядабасетыда.

Людмила Алексеевна – мята лэтамбада некоця. Пыда Якутияхана Олёкминской районхана соявы. Ңацеки ңэванда мальҥгана Тяням' нюбета нюдяко ңэсыхына илевы. Нида невхы" похот ңэрм' яхад пере", халядана" ңэвыць, ханевы", тыдо' таниявыць. Ңобтики ңэрм' терҥэ толы", Саха республикахана иле". Ненэй ненэця" тотрев' харто' яханандо' иле". Харта – не тунгусы. Теда' Ненэцие" округ харе" яданда хая. Ненэця" илм', иландо' мэсыдм' торомдэйда.

ҢЭРМ' ЯХАДАНДИ' ПАҢГДЫХЫ'

Ким Андреевич сиднет повна пухуцяхаданда ңарка. Ханяна ядабтавамда тарем' ваде"ңада:

– 1963 похона Ленинградхана нюртей по' тоходанаванзь товы" тохолкоди" поҥгана сэвтевась. Сядотако Людмила Ильнова таминда сейхани мэевна еремясь.

Тикы' пуд ниди' сававна торомдавэхэнзь. Мэнена пирибтякомда пухуцяданда ханадась. Тев' ёльцянд' ниди' нядабась, хамедамбась мат" ю" по" ямбан' илеҥаха'. Пыди' е"эмнянди' мяти' тер" – сямянд' тараниди'. Вонгуевха' тарем' тасламбиди': «Мэевна илева хусувэхэд пере». Нясьюмба, сахарамбая, хусувэй серкана хамедамбая помнанди' ниди' нядабихи'. Не нюди' небянда, нисянда сехэрэвна илеванда сер' миҗа. Ңока по" ямбан' Коткино' ңэсыхына ңацеки" садхана ервотаҥэ тара. Не нюнди' не ню Ирина ңани' тохолкода (ңацеки тохоламбада). Нютю" мание маймбихи'.

Илевамди' ниди' нядабась няхати' маймбась минреди'. Ким Андреевич харта янда илам' тохоламби, паҥгота ханяд мимам' ма"лавы. 2017 похона нита ня' Хоседа – Хард' мядырмахана ненадумда"мам' масибтевыць. Людмила вэсакоходанда ни хаяр". Хорейвер' я' тер ңобт' ма" лась. Ңока по" «Илебц» театрхана, «Ханебцёхона» сянакусь. Хуркари" марка"на мэкад' серк" пили" тэворцеты.

Тамбир" ңарка няхаюна" маркана мале сидя ю" самляҥг по" илеҥаха'. Тад' нерня' ңод" иланди' сава ңэя. Сензха' ңэяха'.

Тэраҥгова' НЯМНА

Вэба' иры' 18, 19, 20 яля' тэраҥгодава". Ңаха"на илена" Ямал' тер" нерденаҥэ пидте"мидо' падарт' падаҥгу".

Тадри' мюсерць яхато', таҥгоцяҥгато' тиртя ңанохо"на, еся ңанохо"на, машинаха"на тэворта". Яханана" я' индадм' туюхулада" ңани' тамальҥгана тэраҥгурта". Тэраҥгова' серо тидхалембада" мале тенева": ханя' тэворта", сяҥок ненэця' тэраҥгода, ңамгэхэ"на ненэцие" илева' я" ёльцянд' ңэдалёрта". Тиртя ңано" хавна я' нимня трэкол, ид' сяр' нимня ту ңано ядэрць мэта". Ңокханда ты пэрти" ңэсы"мана, хубта яха"на манзарана" ненэцие" ёльцянд' 700 час' ямбан' тирць тасламбидо'.

Ямал' тингэвна 209 тэраҥгось я" манзараҥгу". Госдуман' 450 депутатм' тэраҥгува". Поҥгадандо' ңопой пелядо' партияхат мэҥгу". Няби пелядо' – одномандатной тэраҥгова' округхад. Пилю" иры' юкад вата матдомдэй аляхад тэрабаванда" ненэцие" нямна газетаха"на, телевизоркана падна, лахана пэҥгува".

Ханева' сер"

Тюку илаҥгана ханена" закон' ватом' ёльце нёдабато' тара. Сяха', хурка, сян ханесэйм' хадавамдо' ненадо падаркана палытана" тидхалембидо'.

Ямална" ңардавна ненэця" ханевандо' ёльць тоб", ңокарка ханесэйдамдо' хада пирта". Ханева' серо ня"амбада" ерв" ханесэйҥэ таславы я' сармик" толырм' ңокамдаҥгудо'.

Пилю" иры' нюртей яляхад ненэця" несэймдавы вато' сер" хане пэҥгуд". Ерво" вадавна, я', нув' сармик" тодо" тэнзувнато' ңокма". Теда' по' ямбан' ненэця" хадаванда" ханесэйдо' тамбир" ңэҥгу":

– хабарта": небой" 867 ханесэйхад 1298 пират хада ңэдарамбаҥгу",

– я' мядота": 674 ханесэйхад 761' ёльцянд' ңокамдавыдо',

– тос": 5004 ханесэйхад 5130' ёльцянд' ңокамдавыдо',

– нензад": небойхад ңопой ханедавна ңокмы", 17 нензадм' хада пирта".

Тюку иры' нердена яляхад ненэцие я' мядотавна хане ңэдарамбидо'. Лук", хоркы" ханедаҥэ мэ"ман' харвана" 15 яля' пиркана ханеванзь ханда". 25 яляхад нюдя пэвдей иры' пират ябто", нябы", тамна ңани" нув' сармик" ханесэйҥэ таралтыд".

Юлия Талеева' падвы

Галина Окоэтто' падвы

ОБЪЯВЛЕНИЕ

Ямалхана СВО' няна сайнорта" ненэцие", мято' тер" е"эмня ңадимдевы" няд"ма"



СВОИХ НЕ БРОСАЕМ
ВСТУПАЙ В РЯДЫ РОССИЙСКОЙ АРМИИ

КОНТРАКТНАЯ СЛУЖБА
6 700 000 Р

ЕДИНОВРЕМЕННАЯ ВЫПЛАТА НА ЯМАЛЕ
4 000 000 Р

ПОЛНАЯ ИНФОРМАЦИЯ ПО ТЕЛЕФОНУ
8(902)816-11-90
8(34922)3-98-08
ЗВОНОК ПО РОССИИ БЕСПЛАТНО

МИНИСТЕРСТВО ОБОРОНЫ
РОССИЙСКОЙ ФЕДЕРАЦИИ
contract89.ru

Интернет' мутравна сидна" хось пирҥада", тюкон' тюда"



Тюнд' тяхад җадиберта"



Коряк' тэнзм' мэта" җыхы" похот Камчатка' няна иле". Америка җэрм' няңы индеец иринахатато' паңгдөвәм' невхы яндо' ва"алха"на ваде"җадо'

Юкад' вата' самляңг ёнар" по' тяхана Камчатка' ян' коряк' тэввыд". Ханяңыдо' Америка' җэрм' няңы хэван' илельмыд". Теда' танияңы" индеец" пелдо' тамальңгы тикан' тэввы корякхат паңгды". Тикы ненэцие" тэнз" я"авлада" саюдана" җэвы". Россия' яна" падаркана пыдо' сиддо' 17 векхана ваде"лавы".

Таниянанда җули" нерде' «кар-ака»җэ, «хэёкэл»җэ, нюмдебавыдо'. Тикаханандо' мандним" «тюнд' тяхад җадиберта"». Таль-цюна, тэсавэйңэ хэ"мяхадандо' «хора» вадахад коряк нювм' мэлвы". Хэвханандо' илена" ненэцие" тотрев' пелдо' тэхэ"на иле пэвыд", нябидо' яв' ханенаңэ хэвы". Мюсертидо' мятандо' яранги мэ"җа". Тэхэ"на мэнидо' «чавчувен» нюбе"җа". Җанидо' эскимосхат яв' ханенам' пэрмам' тохолавы". Яв' ханена" пэрта



Пиняңы ембдяро' нюбедо' «ямочгын», луца' вадавна «кухлянка»

нюбедо «нымылан». Хане мэта җанодо' җарка" яв' ханени" хо-бахана нярдамбидо'. Яв' няюна иленидо' я' ваңгм' пелта мятамдо' сертаби".

Едандо' терад тев' тенат ты" җам-зи, яв' ханени" юр", халэ пэрҗа". Хуркари нув' сармикавна хане". Җоди, вэба ма"ламби". Ханесэйто', ты" хобахат җамгэридамдо' сэдаби". Ханяңэхэ"на сабидо' лаха

мэць пэръядо'. Мярёй пимидо' ты' хобахат, пибито' е"эйңэ мэтидо' хуркари" сармик' хобахат сэдыбавыдо'. Не" мэта паныдо' паскойвана падтамбидо'. Сыра' ёря ембдяро мэ"җа". Тохокат сэдвы имбытадо' җани' тания".

Толырмавнандо' сидндет ёнар' пирдо'. Җокаюм' пелядо' ненэй хардаха"на иле". Харто' помнандо' вадамдо' мэта сабе

тяню. Ханяңы" школаха"нато' вадамдо' тохоламбидо'. Хусувэй ту' тер" харто' тадебясавэй". Пыда ненэциеда лэтрамбида, хабцяңгат савумдамбида. Сяхари' хуркари" хэхэто' вадам' минренаңэ пензе-ретана тадебядо' тара. Иринато' тотрев' сямяңхат хэвадаланадо', илам' сертавы «Куткиняку» – Харҗэс' хэхэ' сидяңг.

Коряк' тэнз" ненэцие җани' хуркари" җарка ялэдо' тания". Нара' няна «Каюю» – су"ляко' алям' ядабтамби. Җэрё' «Ололо» – няко яво" няю хэвам' җобнзер" мэ"җа". Җобт' ма"лэбто' сёхо"нато' невхы" иле"ми ваде"җа". Тарабат' сямяңхат ва"лэй", маниеб тэри' илекако".

Коряк" юнета паднана Вла-димир Коянто илеванда ямбан' ненэциета ила' нямна паднавы. Падвэхэ"ната тарця и' җудм' мин-ре: «Нерняңы илма" сава җэванда е"эмня иринана" таславы" невхы" ила' саиро вадёдана" җацекехэ" вадепана" тара. Тикахана хурка-ри ненэць' тэнз' иланда' мин ни сусаңгу"».

Алла Вануйто' падвы

Нув' сармик" нямна җэда" пуномда"ма"

НЮНЯ' НЯМНА

Маңгты" иры сусана – җэрм' я' няю' нюня" тэворҗа". Җопой' җани" нув' сармикаха" манэць, пыдо' җоб"лад" миҗа", мандал"җэ тиртя нюням' нин манэт". Тад таслахаваб", җани" җамгэхэв" яңгана" нув' сармик" нито' помна турцетадакы". Нюня я' ниня пидямда сертабада ни җа". Пидяда ид' ниня хатакарҗа. Нюдо' сар"нюто' мюд җадиво"махадандо' тэри ит' мантырҗа", тикарихина халядарев' и"мна падерҗа". Ненэй ненэць' нюня' җамзам' нидо' җор", халына җабтеманда нид җавыта яңгу нив".

Нюням' ненэй ненэця" илева' ямбан' җобтарем' нув' пуномда"маңэ мэ"җадо'. Сава

яля' ерня нюня лакри' яртадрев' тёры"лабта вэва нуво" товам' пя. Тарця муно мэлбата: «Та, та, та! То' вар" лык, то' вар" лык!» – ядембаңгу. Хурина ядебадахад хэтяламда" җацеки" нюням' манэ"пато' тарем' тёрыта":

Нюнёв, нюнёв, сарёр ханов",
Нюнёв, нюнёв, мерцяр ханов"!
Нюнёв, нюнёв, хаер" таңэ!
Нюнёв, нюнёв, мерцяр таңэй"!

Лахарёхона нюня сямяң нув' сармикахат нув' сёрхана тир" нив". Ненэцие" ихина нув' ерван' тикы мэта вади тэвраванда е"эмня нюнян' тарем' тёрысятдакы".

ЛОРЦА

Маңгты" иры ерҗэ хэванда сер' яра' седа' җэва' ниня лорца" хурина тара". Пыдо' няхато' таредо' тырцелабтая нидо' ладорпа тайкуд санарҗа". Сибякодо' тэри хэвнякуна хадырҗа". Лорца' хора" та' ёльцяңгана сянди" тэнз" таредо'. Җобто"лас лорцам' мандал" поңгана нин манэт". Яля' ямбхана хэвняд мание тебермаримдо' мэтарыха" җэ" ним". Тикы паңондо' хэ"мяхад лорца' хора" валакада ханяхав' хан"җа". Сибяко" харто' нюдо' вадабидо'. Выңгана илена" җацеки" теберта лорца тарем' тёрдембидо':

Лорцов, лорцов, тар' пил серэй",
Лорцов, лорцов, ной' пил серэй"!

Тарця вади намднадрев' тикарихина лорца" сянди" тэнз" таредо' ёҗото' няю' тырцелабтаңгу". Савовна манэць җобкарт җоб" толас тарсавэй лорца яңгу. Таредо' няхатато' мал' яңга".

Раиса Яптунэ' падвы



Сидяңг: Марина Яр' гадтавы



Сидяңг: Марина Яр' гадтавы

Неша" шана'ко мяналя"

Чуки дилиң кашем' дю" дядяхана кальтун дяханатун куптат, дискат дилина" нешади" дет тондота дядя. Чики хома дядя чадю" нешади" тэмс кальтун дилмтун, ватамтун дюлмаң тайхана, няхал дю" шича пун чена шелтамы. Маня" Пюд дяханана чики дядям шанат калват та'амна мэштутун.

Нэдм' чел" нешади" ныптакомаң, поңкнатун шана'комаң мэт Тал-кахана мяналма дядям мэ'наш". Чуки «Год здоровья» ними'та по-



хона нука неша" мянадмантун мэты жома". Талкахана дилина" нешади" камна Самбудкахат, Калпюдкат, Калясамэхэт, Ханымейхат, Муравленкахат, Тазовский' районхат мэна" неша" тоңа". Нопшел шеэв'дю" шеэв мяналта". Кукиты чуват выңкат томы". Нюңк' раймямтун, нэхэмтун конулпёшь вядкудолыш, ха'мольш, нэхэлүмпёш, этнобиатлонхана мянадыш чепилыш". Надка неша", нашки" тотун шичитун мян няханатун мяналя".

Недьчезей вядкудолыш". Хамплярк минутахана няхадмэмаң конодыштутун. Мяналта" нюңкмана вядкудолыш". Няхал'дзянкня – хамплярк'дзянкня потун' райта нашки" няхал'дзянкня метр' кункана патдата няляңпаңк вядкудпи". Нашкиуди" дёдыше хомана мяналя". Ни нашки" поңкна' райвахай местам' Анна Агичева канаңата, каса нашки" поңкна – Николай

Пяк. Мат'дзянкня – шеэв'дзянкня потун' райта нашки", надка неша" вядкудпётатун' няляңпаңк купташуна, хамплярк'дзянкня метр'аң кункана патдаңа. Кукиты" шандиң нидештутун.

Ни нашки" поңкна Екатерина Яптунай нэхэля, каса нашки" поңкна пиди нюңкмана Владимир Агичев вядкудолыш, пыта' райвахай местам' канаңата. Надка нешади поңкна вядкудолта" касамахат" Семён Вануйто нэхэля. Пыта' нука мэмаң няляңпаңк вядкна. Нимимты мянадматон' – няхал ха'мхана ха'мудма. Няхал ха'мхана ха'мудта", няхал'дзянкня – хамплярк'дзянкня потун' райта нашки" поңкна' райвахай местам' Дарина Сергун, Николай Пяк канаңач'. Мат'дзянкня – шеэв'дзянкня потун' райта ни нашки" нашки" поңкна' райвахай местам' Дарина Сергун, Николай Пяк канаңач'. Мат'дзянкня – шеэв'дзянкня потун' райта ни нашки" нашки" поңкна' райвахай местам' Дарина Сергун, Николай Пяк канаңач'.

Надка неша" нупчики нюңкмана мяналя", ни" поңкна Наталья Королевич нэхэля, касамахат" – Николай Пяк. Нэхэлүмпюта" нупчики нюңкмана мяналя". Няхал'дзянкня – хамплярк'дзянкня потун' райта каса нашки" нашки" поңкна Самуил Казымкин' райвахай местам' канаңа. Нэхэлүмпюта" ни" поңкна – Августа Павлова нэхэля, надка каса нешади" поңкна – Семён Вануйто' райвахай местам' канаңа.

ШУДВИДЫШ НЯЛЯҢПАҢК ВЯДКУДПИ"

Четты мянадматон' – «Этнобиатлон». Таңичохой талыша эстафета' хыды мянадмахат' нинди. Неша" пям ня'ампёшь шудвилья". Мяналта" шудвилья матапёмытун' нотакоотун' дямп, стадионмана' райта нотакомна шанат мэмаң шудваштут". Таньше шудвильмантун' поңкна мяналта" няляңпаңк тыньшаха-

на вядкудпи". Кимья шан мэмаң нидиңата, таңок мэмаң штрафной круган кэшту". Чики пэшкотлям шелтамы нотакоотун' кунта дюл' метр' кун.

Таньше мяналма неньшал ниңа. Чики эстафетахана няхал'дзянкня – хамплярк'дзянкня потун' райта ни нашки" поңкна' райвахай местам' Нэлли Покачева канаңата, каса нашки" нашки" поңкна' райвахай местам' Иван Пяк нэхэля.

Этнобиатлонхана мяналта" ни" поңкна' райвахай местам' Наталья Королевич канаңата, каса нешаңкат" Василий Салиндер нэхэля. Пиди путаш этнобиатлонхана мятчел" дет' райта эстафетам шелтаңа". Хамплярк мятчел" мяналя". Нездья каса" стадионмана шудваштут, шулпаш патдата" няляңпаңку" дилт нудаштут, тыньшахана няляңпаңк вядкашту". Чикехет' рай шудваштут, тай"ня пушахатун' тыньшахатун' миштутун. Ни" нупчики стадион' шулпаш маташту", няляңпаңк вядкашту", чикехет' ниhi"тун' тыньшахатун' миштутун. Нашкиуди" нупчики нешанатун' немянатун' шел мяналя". Мяналта" маньшту" таньше шана'кома неньшал ниңа, чикехэна' нотаң дёдыше вилья. Мятчел" дет' райта эстафетахана Самбудкахат мэнахаң Артём, Нина Тэсида нюувдемч' няш нэхэляхаң. Нимимты местам Калпюд няңат, выңкат томэхэң нешихиң Евгений, Татьяна Пяк каса нюувдемч' няш канаңач. Пытун' нупчики хомана мяналя". Няхамты местан Талкахана дилина Вячеслав, Анжела Пяк мятчел' ка'мдыт. Пычи нюувдемч' няш дёдыше нюңкмана мяналяхаң. Мянадыш хитамахататон' хомана шана'комы", вядкудолыш, ха'мольш, нэхэлүмпёшь, этнобиатлонхана' райвахай няхал местам канамы", тотун' мячисы" – медалю", диплом' патду" ня'амна".

Чикиң камна мянадыш нэхэлды" ассоциацихит «Ямал-потомкам!» вешаң дет' райта сертификату" ня'амна". Мянадыш неша" маньшту": таньше нопт' жома, мянадыш шана'кома дёдыше хомашел. Нэдм' чел" нешай" дет' тондота управленихана мансданна", спорт дет' таслёт' управленихит мэна", ассоциацихит «Ямал-потомкам!» мансданна" нуп' нэхэхана дёдыше хомашел, вилья спортивный' мероприяти' шелтаңа".

Талыша хомашел" нартана" нашки" де'эмня талыша", навэт кальтун' тэмстун' дилм, ватам, культурам дюлмаңтайхана.

Лариса Айваседо патмы





Таттама: Лариса Айваседо таттамы

Хэбидя варк' лаханаку

(Нердена пеляда 31 номеркана жа)

Тюку ямидхы лаханако Енся' няна Усть-Енисейской район' няна илена ненэцянгат намдавы. Вадандо' хэтыр" хаця яуга. Толаугобта", инзеленарахата" нэугуда". Вадидо' лаханавандо' сер' падвы".



Падта"ма": Руфина Окотэгто' падтавы"

Амгэ ёльчүгана нита ядми хойда. Ма: «Нини ноб ядми-ту мюмня хевы"». Тад нита ядми" мюмня пята. Тарем сяври хунари ядбата нод" сивм тарката хо хэван тэвы". Чикы сивм тарката хо хэвхад сивда папада сив сехэрэвна хевы". Нарка няда паркасяда варкнэ хевы, нянта нылы иүгнейнэ хевы, няхарумчейду ты ханонданэ хевы, чечумчейду сэр" явыкнэ хевы, самблянгумчейду пиянэ хевы, матумчейду тоснэ хевы, пили" нюдя папада варкнэ хевы.

Тад пыда чикана нусь ибедорна, манчты: «Абэй, абэй, нини ядми сябладамню". Чеда хучер" нэб" саво нэпта? Малесяблайнаню. Нюдя няни ядма мюмня чеда пясусув".

Ят сяври хунари ядбата нод", амгэ ёльчүгана варк ваңк нимня нэдимя. Тад чикы ваңк нёхона сидя варк нюкчаха' чивриди' хаерауга". Чикы не няю нарнажаха'.

Тад мякад ноб не вахалмонта, тарем мамононта:

– Вэн палкаха', амгэн нарнади? Нянанчи' тарана нэпта яугуари, мят чулери! Нянанчи' тарана нипча жа", чикан ныднари, нэмары!"

Тад варк нюкчаха' чу вэнсумаха'. Маңкхаюнанчи' ливдеди, тад мят чуледи.

Мякана ноб не нэмчувы. Чикы не ма:

– Папант ядми нули" сяблаедню". Ноб ялякочарт нани нэченарван.

Тад чикы не нямта нэвлада. Нэвламаданта ма:

– Папар взвась. Пуна топта сит чеда такалсудм.

Тад тарем лаханортанчи' мячи' мюй табор" синя пулэйд", тад нё ня пулэйд".

Тад чикы не ма:

– Чи, папар товононта. Наркавна ненсюмы.

Не нямта тад хансо ня такалжада. Нямта такломаданта пихиня мале турута ялнари совононта.

Тад недя ма:

– Нябаконт сейм амгэн тамбирувна харебир? Тарем чод" чукод хэмяданта, маяндорманта ямбан сянок ныликам хоңгу. Тарем нод" чикы ёльчүгана сейда хант" ни.

Не тарем маңгава варк ланума. Мят чу. Тарта нерня пырдарей". Мят чумаданта ваны". Пи ямбан тания хасена.

Хуняна юркыд". Папада мале хэвы.

Тад чикы не ма:

– Чу юркад", нор! Тад нод" хант" нинав. Хадно" чёкона пон иле вынир пират".

Нянта нортаханта ноб улюку падкочам паны сисянт сярата.

Тад пин тарпьяха'. Не няханта манма:

– Таняю хань"! Ян чундувна нён яд"! Такы неру" сёймана яд"!

Тад няда хая. Сяври хунари ядбата нод" нумда нарэйма. Тад ноб таняхуна ма: «Нэни нули" никадавонту. Такы чунд нимня хэхэвабнани саво нэугусь".

Тад чунд ни танэй". Ма: «Такы посава сал ни нывлапчч нэмдхарчув".

Тад посава сал ни нэмдванта сер посава сал хэвня лекэй". Тад чикы посава сал мюд парны нея чикад нэдимя.

Тад парнэ нея ма:

– Неңэй, чикы паныд мань няни тан"! Пыдар чуку сяпт паныни сер"!

Тад нянта сядм мал хэдежада.

Тад няда ма:

– Япткоен, сями нёр хадес! Паныни татын.

Тад паныда, пибида пимясавэй малнэ мийда. Тад парнэхэнта ма:

– Япткоен, чикы улюку падкочами та"!

Тад парнэ ма:

– Жа", падкочавар ханад! Мань нянани ни тара".

Тад нэкалжада, няханта мода. Ненэй неюм чикы падкочанта мюд тамна саво паны нэдимче.

Тад парнэ ма:

– Нявэй, паныд няни тан"! Чуку паны пыдар мэс"!

Тад ненэй неюм ма:

– Саво панэхэбини нянт чи таен, чуков" взва паныни нэ" ним.

Тад парнэ няханта ма:

– Нявэй, чедав ноптолсаңэ хэрхани'. Чеда хасавадми' пюванчч хэхэни!"

Тад хаяха'. Парнэюм нерде тырсара. Тад сяври хунари ядбачи' нод", ноб яха нимня нэдимяха'. Чикы яха сэркана сидя хан сярвэхэ'. Няби ханхана чет сэр" хапт" подеры", няби ханхана чет париденя хапт" подеры". Хасаваха' нани яха нэдарыхана пиндавончи'.

Тад парнэ няханта ма:

– Чуку сэр" ты мэта мань хасавами нэңгу. Такы париденя ты мэта нани пыдар хасавар нэя!"

(Пелямда нэдиманда газетахана полаира")

«Ненецкий фольклор»
толаугобць' мюд ханавы,
К. И. Лабанаускас' падвы



Хусувэй по’ пило’ иры’ хасава юдимдей
яляхана тодо” тэнз” ненэця” нобт’
ма”люржа”. Сава им’ мэць нидо’ ядабтамби”

Паңгхатато’ перена” ненэця”

Пилё’ иры’ хасаваюдимдей’ яляхана я’ сяр’ ниня ноб” нарка
ялям’ ядабтамби”, нюмда «Международный день коренных
народов мира». Невхы”, харто’ соя”ма яханато’ паңгм’ мэта”
ненэция” ед’ таславы яля.



Харто’ яндо’ илм’ няхато’ ваде”жа”.
Сё” мэтидо’ сёята”, таранидо” тара”.
Сёбар” хибя” помнандо’ таро”жа”

Я’ сяр’ ниня соя”ма яханато’
невхы” паңгхатато’ перена”
хуркари” тэнзм’ мэта” ненэця”
таня”. Тодо” пареңода” яха”на
тарця” илена” мале жока”.
Толырманандо’ самляңг’ юр”
луца” ю” ёнар” пир” нэңгу”.
Помнандо’ няхатато’ яңга”.
Хусувэдо’ иланда’ минан’ харта
таславы” серода минре. Я’ ханя-

рина мал” ноб” пирсувнани” иле”.
Ханяңы” нензел” илм’ ни” мэс”.
Маңгба иле”, толырманандо’
саць тянёворжа”, харто’ вадав-
нандо’ лаханакурць нэвадаңга”.
Җани” – пили” сусаңга”. Я’ нид
ненэция” тэнз” сусаңгава сава
сер” нули” вуни жа”.

Хибяри” харто’ мысодото’,
тохолирто’ сер’, иринато’ вадам’

мэць сававна илевандо’ няю’
Организация Объединённых
Наций 1982 поход ибедо”лиць.
Тиканда 1994 поход пило”
иры’ 9 яля я’ ханярина «Невхы”
паңгхатато’ перена” ненэция”
нарка яляңэ толы. Нерденя ю”
по” ямбан’ я’ сяр’ ниня жока
хибя тикы ңадимы” серо” таром’
ховэдо’, таро”мэдо’. 2004 по-
хона ООН’ тер” нябимдей нобт’
ма”лёрмы”. Иландо’ саирм’
тид” нёдавандо’ няю’ ваде”мы
серодо’ тамальңгад минрейдо’.
Неноховавна ңаврандава”,
лекаратаңгова”, тохолкова” сер”
сямянхат тарана” няд”ма”. Тарем’
сававна илева’ е”эмня нядаңгу”.

Пило” иры’ 9 яля маня”
яханана” ңани’ саць тарана яля.
Тикы яляхана харто’ яханато’ не-
вхэт илени” ед’ ңэда” серо” нямна
ваць лахана”. Юркад вата хасава
ю” тэнзм’ мэта ненэця” мэввна
Россия яхаданда паңгды. Тет
ю” си”ив тэнз толырмавнандо’
тянёмбой” хибя”.

Тикы” поңгад тет” ю” – ңэрм’
я’ няюна илена”. Невхы паңгото’
ила’ хари, харто’ вадамдо’
нёдабавандо’ е”эмня яна”
ңэвахана мэна” табеку сертаби”.
Җобнзер” тасалкомахадандо’
няд”ма’ няю’ ңэда” серо ненэция”
илүгана таро”ядо’. Хуркари
хибя’ тэнз’ илм’ лэтрамбава
ңабцата сава сер”.

Я’ невхы харто’ соя”ма яханато’
паңгм’ мэта” ңэрм’ тер” харто’
иландо’ саирм’ нерня’ минрева’
няю’ ңани’ тасалкода”. Сянри”
ёнар” по” хэб” ңод” невхы”
паңгхатато’ перена” ненэция”
иринато’ мэ”мы” ила’ саиро
минребто’ тара”.

Алла Вануйто’ падвы

Хобцоко”

Таслара”, хурка
вада” сюры”?



ЦЁ



ЛЯ



Х=Д



А

Ц



”



Я

Татьяна Сэротэтто’ сертавы”

Газета «Няръяна Нгэрм»	И. о. главного редактора Кинчина Галина Сергеевна	ГЕНЕРАЛЬНЫЙ ДИРЕКТОР АНО «Ямал-Медиа» Зулинова Мария Андреевна	№ 32 Подписано в печать 06.08.2026 г. Вышла в свет 08.08.2026 г. По графику: 16.00, фактически: 16.00.	ПОДПИСНЫЕ ИНДЕКСЫ: на год – ПА701, на полугодие – ПР562.
Учредитель – департамент внутренней политики ЯНАО (629008, ЯНАО, г. Салехард, пр-кт Молодёжи, д. 9, каб. 708).			Тираж 3600 экз.	Цена годовой подписки 166 руб. 84 коп.
Издатель – департамент внутренней политики ЯНАО (629008, ЯНАО, г. Салехард, пр-кт Молодёжи, д. 9, каб. 708)			Заказ № 281 тз (тираж 3600 экз.) отпечатан в АНО «Ямал-Медиа» Юридический адрес: 629003, Ямало-Ненецкий автономный округ, г. Салехард, мкр. Богдана Кнунынца, д. 1, каб. 106	В розницу не распространяется.
Газета зарегистрирована – Управлением Федеральной службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО от 19 апреля 2012 года. Регистрационный ПИ № ТУ72 – 00559			Фактический адрес: 629007, Ямало-Ненецкий автономный округ, г. Салехард, ул. Чубынина, 39А	Адрес редакции: 629003, ЯНАО, г. Салехард, мкр. Богдана Кнунынца, д. 1, каб. 106 тел. +7 (349 22) 4-53-32
			Газета выходит по субботам.	E-mail: nn@yamal-media.ru